



**Komunikadu Imprensa**  
**15 Jullu 2020**

## **JSMP apresia Parlamentu Nasionál ba hanaruk funsionamentu serbisu hodi finaliza lei importante sira**

Funsionamentu normál serbisu Parlamentu Nasionál nian regula iha Lei Nú. 15/2009 kona-ba Rejimentu Parlamentu. Iha provizaun Artigu 45 pontu 2) Lei Nú. 15/2009 prevee katak períodu normál funsionamentu Parlamentu Nasionál nian hahú iha 15 Setembru no hotu iha 15 Jullu ho la iha prejuízu ba períodu suspensaun Natal nian entre 23 Dezembru no 02 Janeiro tinan tuir mai no mós suspensaun sira seluk ne'ebé Parlamentu Nasionál decide ho maioria rua baluk tolu (2/3) husi deputadu eleitu sira.

Iha reuniaun plenaria 13 Jullu 2020, Parlamentu Nasionál diskute no aprova rezolusaun ida hodi hanaruk tan funsionamentu serbisu Parlamentu nian to'o 30 Jullu 2020. Objetivu husi hanaruk tempu serbisu ne'e mak atu diskute no aprova Lei Anti Korrupsaun ka lei kona-ba Medida Preventiva no Kombate Korrupsaun, Lei Protesaun Sivil no Orsamentu Privativa Parlamentu Nasionál nian.

“JSMP apresia aas tebes desizaun Parlamentu Nasionál hodi hanaruk tan tempu ba funsionamentu normál Parlamentu nian to'o 30 Jullu 2020 no konsidera desizaun ne'e pozitivu tebes tanba tau aas interese estadu nian hodi sakrifika direitu deputadu sira-nian ba resesu tuir lei. JSMP espera katak kultura no prátika ezesionál hanesan ne'e bele nafatin kontinua iha tempu sira tuir mai,” dehan Diretora Ezekutiva JSMP, Sra. Ana Paula Marçal.

Diskusaun ba asuntu ida ne'e, tuir observasaun JSMP nian la iha pro kontra entre deputadu sira, tanba deputadu hothotu konsidera agenda ida ne'e importante ba interese estadu nian. Rezultadu votasaun ba rezolusaun ne'e, husi total deputadu 53 ne'ebé marka prezensa, deputadu 51 afavór, na'in 2 abstensaun no kontra 0.

Prezidente Parlamentu Nasionál iha nia intervensaun hateten katak mezmuke Parlamentu Nasionál sei resesu depoisde 30 Jullu 2020, maibé bainhira iha situasaun ruma atu trata asuntu urjente ruma, ejize deputadu sira tenke reune liuhusi konvokasaun Komisaun Permanente nian.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>